

止觀品第一百八十七 成實論卷第十五

成實論卷第十五

問曰：佛處處經中告諸比丘。若在阿練若處。若在樹下。若在空舍。應念二法。所謂止觀。若一切禪定等法皆悉應念。何故但說止觀。

答曰：止名定觀名慧。一切善法從修生者。此二皆攝。及在散心聞思等慧亦此中攝。以此二事能辦道法。

所以者何？止能遮結。觀能斷滅。止如捉草，觀如鎌刈。止如掃地，觀如除糞。止如揩垢，觀如水洗。止如水浸，觀如火熟。止如附癰，觀如刀決。止如起脈，觀如刺血。止制調心，觀起沒心。止如灑金，觀如火炙。止如牽繩，觀如用剗。止如鑷鑷刺，觀如剪刀剪髮。止如器鉞，觀如兵杖。止如平立，觀如發箭。止如服膩，觀如投藥。止如調沒，觀如印印。止如調金，觀如造器。又世間眾生皆墮二邊。若苦若樂。止能捨樂，觀能離苦。

又七淨中戒淨心淨名止，餘五名觀。

八大人覺中六覺名止，二覺名觀。

四憶處中三憶處名止，第四憶處名觀。

四如意足名止，四正勤名觀。

五根中四根名止，慧根名觀。力亦如是。

七覺分中三覺分名止，三覺分名觀。念則俱隨。

八道分中三分名戒。二分名止，三分名觀。戒亦屬止。

又止能斷貪，觀除無明。如經中說。修止則修心。修心則貪受斷。修觀則修慧。修慧則無明斷。又離貪故，心得解脫。離無明故，慧得解脫。得一解脫，更無餘事，故但說二。

問曰：若止觀能修心修慧。修心慧故，能斷貪及無明。何故定說止能修心，能斷貪愛。觀能修慧，能斷無明。

答曰：散心者諸心相續行色等中。此相續心。得止則息故說止能修心。從息心生智。故說觀能修慧。以生觀已後有所修皆名修慧。初慧名觀後名為慧。若經中說修止斷貪。是說遮斷。何以知之。色等外欲中生貪。若得止樂則不復生。如經中說。行者得淨喜時捨不淨喜。若說無明斷是究竟斷。何以知之。無明斷故貪等煩惱斷滅無餘。經中亦說離貪故心得解脫是名遮斷。離無明故慧得解脫是畢竟斷。有二種解脫時解脫不壞解脫。時解脫是遮斷。不壞解脫是畢竟斷。

問曰：時解脫是五種阿羅漢無漏解脫。不壞解脫是不壞法阿羅漢無漏解脫。何故但說遮斷耶？

答曰：此非無漏解脫。

所以者何？時解脫名但以上力少時遮結。而未能永斷。後則還發故非無漏。又此解脫名時愛解脫。漏盡阿羅漢無所可愛。

問曰：若爾則無聖所愛戒。

答曰：以諸學人漏未盡故我心時發。是故於戒生愛。非阿羅漢我心永滅而生愛也。

問曰：瞿提阿羅漢於時解脫六返退失。恐第七退故以刀自害。若失有漏不應自害。故知時解脫不名有漏。

答曰：此人退失所用斷結禪定。於此定中六返退失。第七時還得此定。便欲自殺。爾時尋得阿羅漢道。是故魔王謂。學人死繞尸四邊遍求其識來。白佛言。世尊。云何汝弟子未漏盡而死。佛言。此人已拔愛根得入泥洹。

問曰：若斷貪名遮斷者。經中說。從貪心得解脫。從恚癡心得解脫。又說斷貪喜故心得好解脫。又說從欲漏心得解脫。如是皆應名遮解脫非實解脫。

答曰：是中亦說無明斷。故知是畢竟解脫。若說斷貪或是遮斷或畢竟斷。若不生真智則是遮斷。隨生真智是畢竟斷。無有用止能畢竟斷貪。若然者。外道亦能畢竟斷貪。而實不然。故知但是遮斷。

問曰：經中說。以止修心依觀得解脫。以觀修心依止得解脫。是事云何。

答曰：行者若因禪定生緣滅智。是名以止修心依觀得解脫。若以散心分別陰界入等。因此得緣滅止。是名以觀修心依止得解脫。若得念處等達分攝心。則俱修止觀。又一切行者。皆依此二法得滅心解脫。